

zuzendariari

(0034) 943 300 222



zuzendariari@egunkaria.com



Martin Ugalde kultur parkea 20140 Andoain

'Berdinak desberdintasunean'

Inma Ortega (EILASeko kidea)

STEE-EILAS sindikatuak eskutitz honen bitartez eskertu nahi du otsailaren 2an zuen egunkarian ikasle etorkinen integrazioari buruz argitaratutako *Berdinak desberdintasunean* erreportaia. Gai horrek garrantzi handia du, eta erreportaiak ondo zehazten ditu gure hezkuntza sistemak dituen premia berriak eta gabeziak ikasle horiek ikastetxeetan sartzeko orduan.

Hala ere, sindikatu honek zuzenketa bat egin nahi du erreportaia horretan emandako informazio baten inguruan: bertan aipatzen da EILAS sindikatuak hainbat esperientzia abiatu dituela,

haien artean «harrera gelak» Araban. Sindikatu honek ez du bultzatu gela horien sorrera, eta, gainera, artikuluan ondo esaten den moduan, ez zaigu iruditzen modurik egokiena ikasle etorkinak eskolatzeko.

Beraz, informazio hau argitzea eskertuko genizuke. Besterik gabe, agurtzen zaituztegu.

Iñigo Aranbarriri erantzunez

Xabier Irastorza • GRADIGNAN (FRANTZIA)

Iñigo Aranbarri Literaturan adituari:

Zure mintzatoki pribilegiatutik ari izan zara, modan dauden intelektualilloen antzera, baina ez zait iruditzen oso azka-

rra izan behar denik batzuen gainean zaborra botatzeko, jakinik bentajarekin ari zarela.

Aholku bat baino ez nizuke eman nahi, ez bazaizu axola: zure izenean idatzi, eta ez «irakurleen» izenean. Pixka bat umilagoa izan, talaatik jaitsi, eta ez zara hain barregarria edo patetikoia geldituko (horretarako hobe da zuzenean txisteak kontatzen hastea, eta hori bai, nire uste apalean irakurleak eskertuko lizuke). Barkatu baldar honen atrebentzia. Besterik gabe, irriño bihurri bat gure idazle klandestinoei.

Igandeko derbiaz

Jorge Martin Luque • ASTRABUDUA


Futbolari eta futbolzale agurgarriok:

Joan zen igandeko Athletic-Reala derbian gertatutakoa aitzakiatzat hartuta, gogoeta batzuk aipatu nahi nituzke. Nire iritziz, Javier de Pedro eta Darko Kovic jokalarien jarrera lotsagarria izan zen. Hala ere, esan nahi dudana ez da jokalariei bion igandeko jokabide horietara mugatzen.


Dakizuenetz, ez da lehen aldia derbi batean horrelako gertaerak jazo direna. Horregatik, galdera bat egin nahi diot irakurri nahi duenari: ba al dakizue zer adinetako umeek ikusi zuten igandeko futbol partida?

Azkenik, eta bukatzeko, Euskal Herri osoan futbolearen aritzen diren ume kopurua kontuan hartuta, lehen mailako jokalariek beste jarrera bat hartu beharko lukete.

montxo



galdeiozu... ?



Hemen eta Munduan taldeko kidea

AHT, Boroa, Itoitz... gerra galduak al dira?

Josu Etxebarria (Santurtzi)

Ez nituzke parean jarriko borrokak eta gerrak; gerrak suntsipena dakar, eta borrokak, berriz, sormena, bizia eta lorpenak. AHT, Boroa eta Itoizek aurrera segitzen dute, baina herritarren borondatearen kontra. Lorpena da gai hauetaz gizartean zabaldu den jakin-mina, ezagupena eta konpromisoa. Lorpena dira, era berean, borrokatzeko era berriak: indarkeriarik gabeko ekintza zuzena, desobedientzia zibila, erreferenduma, eta abar; baina behar beste indar ez dugula bildu ere erakutsi du. Hori da erronka. Gainera, agerian utzi du Nafarroan eta EAEn aginteko alderdiak interes pribatuen alde daudela eta herriari begirune eskasa diotela (non da erabiltzen duten *eman herriari hitza* leloa?).

Otsailaren 11tik aurrera **Nagore Aranburu** • aktorea izango da Galdeiozu ataleko gonbidatua. Bidali zure galderak ordurako. galdeiozu@egunkaria.com

hirusta



Fredi Paia

Aukera kostuak

Artikulu hau abstrakzio ariketa baten oinarritutako literatur adibidea da. Errealitatearekin aurkienezaketen antzekotasun oro, kasualitate hutsa da).

Demagun herri batean egunero euria dargoiola. Ez edozelan, gainera: eurite ikaragarriak izaten dira. Aroa ez dagoenez gizakion mende, herri horretako biztanleak betiko gaixorik egotera behartuta daude. Egunero bustitzeak gaitz ugari sortu baitie: izurria, sukarra, buruko mina...

Hori ikusirik, euriak busti ez ditzan, enpresa sortzea erabaki dute herritarrek. Lantegi horretan zirak eta guardasolak ekoizteari ekin diote. Herri txikia da gure adibidekoa, eta bizirik irauteko beharrezkoak diren beharrak egiten dituztenak alde batera utzita, sei langile baino ez ditu gure zorioneko lantegiak.

Zira urdin eder batzuk ekoitzi dituzte, herritarrei inolako ordainik eskatu gabe oparitzeko as-

motan. Aterkiak, berriz, Erromako zubiaren kolore denak erabiliz egin dituzte, eder eta zabalzabalak, kuadrila oso bat lehor mantentzeko modukoak. Baina hau ez da John Forden *How green was my valley* filmeko sekuentzia. Laster topatu dituzte lehenengo arazoak.

Biztanleria osoarentzat zira bana egiteko, enpresa espezializatu eta profesionalizatu beharrean da. Egiten duten zira bakoizteko, gainera, hiru euritako egiteari uko egin behar diote (aukera kostua). Eztabaidan hasi dira; herritar guztiek zirak eduki ditzaten, produktu horretan profesionalizatu behar lukete. Bestela, aterkiak egiteari ekin, jakinik bi gauzak batera egiteak ez duela arazoa konpontzeko besteko efizientzarik lortzen, eta aterki gutxiagorekin jende gehiago babes daitekeela kontuan hartuta.

Arazoa da, beraiek hau eztabaidatzen duten bitartean, jendeak bustitzen jarraitzen duela.